

runt ad Apostolos in Ierusalem. Act. c. 15. vers. 1. 2.

*Paulus & Barnabas transeunt per Phœnicem, & Samariam.*

XXVI. Illi ergo deducti ab Ecclesia (Anthiochena) pertransibant Phœnicem, & Samariam: narrantes conversionem Gentium, & faciebant gaudium magnum omnibus fratribus. Act. c. 15. vers. 3.

*Paulus & Barnabas veniunt Ierosolymam, in qua concilium habetur.*

XXVII. Cum venissent Ierosolymam, suscepti sunt ab Ecclesia, & ab Apostolis, & Senioribus, annuntiantes quanta Deus fecisset cum illis. Surrexerunt autem quidam de hæresi Pharisæorum, dicentes: quia oportet circumcidi Gentes, præcipere quoque servare legem Moyfi. Convenerunt Apostoli, & Seniores videre de verbo hoc: Et cum magna inquisitio fieret, Petrus oravit pro Gentibus, auditi etiam Barnabas, & Paulus, tum & Iacobus. Statutumque non inquietari debere eos, qui ex Gentibus convertuntur ad Dominum. Tunc placuit Apostolis, & Senioribus cum omni Ecclesia eligere viros ex eis, & mittere Antiochiam, cum Paulo & Barnaba. Iudas, qui cognominatur Barsabas, & Silas, viros primos in fratribus: Scribentes Apostoli, & Seniores Fratres his, qui sunt Antiochiæ, & Syriæ, & Ciliciæ fratribus ex Gentibus salutem. Quoniam audivimus, quia quidam ex nobis exeuntes turbaverunt vos verbis, evertentes animas vestras, quibus non mandavimus: Placuit nobis collectis in unum, eligere viros, & mittere ad vos, cum charissimis nostris Barnaba, & Paulo... Visum est enim Spiritui Sancto, & nobis, nihil ultra imponere vobis oneris, quam hæc necessaria: ut abstineatis ab immolatis simulachrorum, & sanguine, & suffocato & fornicatione; à quibus custodientes vos bene agitis. Valet. Act. c. 15. vers. 9...29.

*Paulus & Barnabas redeunt Antiochiam.*

XXVIII. Illi ergo (P. & B. & Iudas qui cognominatur Barsabas, & Silas) dimissi descendunt Antiochiam, & congregatâ multitudine tradiderunt Epistolam: quam cum legissent gavisi sunt super consolatione... Paulus, & Barnabas demorabantur Antiochiæ docentes, & Euangelizantes Verbum Domini. Act. c. 15. vers. 30...35.

*Paulus, & Silas relictâ Antiochiâ perambulant Syriam, & Ciliciam.*

XXIX. Post aliquot dies dixit ad Barnabam Paulus: revertentes, visitemus fratres per universas civitates, in quibus prædicavimus Verbum Domini, quomodo se habeant: Barnabas autem volebat secum assumere Ioannem, qui cognominatur Marcus. Paulus autem rogabat eum, ut qui discessisset ab eis de Pamphilia, & non esset cum eis in opus, non debere recipi: factaque est dissensio, ita ut discederent ab invicem: & Barnabas assumpto Marco navigaret Cyprum: Paulus

vero electo Silâ profectus est, traditus gratiæ Dei à fratribus perambulabat Syriam & Ciliciam confirmans Ecclesias, præcipiens custodire præcepta Apostolorum, & Seniorum. Act. c. 15. vers. 36...41.

*Paulus cum Silâ redit Derben, & Lystra.*

Pervenit (Paulus) Derben, & Lystra. Et ecce Discipulus erat ibi nomine Timotheus, filius mulieris Iudææ, fidelis, patre gentili, huic testimonium bonum reddebant qui in Lystris erant, & Iconio fratres. Hunc voluit Paulus secum proficisci: & assumens circumcidit eum propter Iudæos, qui erant illis in locis. Sciebant enim omnes, quod pater ejus esset Gentilis. Cum autem pertransirent civitates, tradebant eis custodire dogmata, quæ erant decreta ab Apostolis & Senioribus, qui erant Ierosolymis. Et Ecclesiæ confirmabantur in fide, & abundabant numero quotidie. Act. c. 16. vers. 1...5.

*Transit per Phrygiam, & Galatiam, & Mysiam, & descendit Troadem.*

Transeuntes (Paulus & Silas) Phrygiam, &

Galatiæ regionem, vetati sunt à Spiritu Sancto loqui Verbum Dei in Asia, & cum venissent in

Mysiam, tentabant ire in Bithyniam, & non permisit eos Spiritus Iesu, cum autem pertransissent Mysiam descenderunt

Troadem, & visio per noctem Paulo ostensa est: Vir Macedo stans, & deprecans eum, dicens: Transiens in Macedoniam adjuva nos. Et.. statim quærivimus proficisci in Macedoniam, certi facti, quod vocasset nos Deus Euangelizare eis. Act. c. 16. vers. 8.9.

*A Troade navigat in Macedoniam, & Philippis in vincula conjicitur, & liberatur.*

Navigantes à Troade, recto cursu venimus Samothraciam, & sequenti die Neapolim, & inde

Philippos, quæ est primæ partis Macedoniæ civitas, colonia: Eramus autem in hac urbe dies aliquot, conferentes: die autem Sabbatorum egressi sumus foras portam juxta flumen: ubi videbatur oratio esse. Et sedentes loquebamur mulieribus, quæ conveniant. Mulier autem nomine Lydia, purpuraria civitatis Thyatirenorum colens Deum, & cujus Dominus aperuit cor intendere his, quæ dicebantur à Paulo. Cum baptizata esset, & domus ejus, deprecata est dicens: si judicatis me fidelem Domino, introite in domum meam, & manete, & coëgit nos.

Euntibus nobis ad orationem, Puella Spiritum habens Pythonem, obvia fit, & subsecuta nos clamabat: Isti homines servi Dei sunt, & annuntiant vobis viam salutis. Paulus Spiritui præcipit, ut in Nomine Iesu Christi exiret ab ea, & exiit eadem hora. Domini autem puellæ, qui ex ea multum lucrabantur, apprehendentes Paulum & Silam perduxerunt in forum ad Magistratus;